

DOMINGU XI TEMPU KOMÚN – TINAN A

Tema

Iha domingu ne'e, Liafuan ne'ebé ita sei reflète fó hanoin mai ita kona-ba Maromak nia prezensa konstante iha mundu no ninia vontade atu oferese salvasaun ba ema sira. Maski nune'e, Maromak nia intervensaun iha istória umana konkretiza liuhusi sira ne'ebé nia bolu no haruka, atu sai sinál vizivel nina domin nian no sasin ninia laran-di'ak.

Leitura dahuluk apresenta mai ita Maromak “Aliansa” nian, ne'ebé hili Povu ida atu estabele talin komuñau no familiaridade ho nia; ba Povu ida-ne'e, Jahwéh konfia misaun saserdotál ida: Israel tenke sai Povu ida rezerva ba servisu Jahwéh, katak, sai sinál Maromak nian iha nasaun sira seluk nia leet.

Evanjellu lori “diskursu misaun nian”. Mateus apresenta katekeze kona-ba hilin, bolun no enviu “na'in sanulu-resin-rua” nian (ne'ebé representa totalidade Maromak nia Povu) atu haklaken “Reinu”. “Sanulu-resin-rua” sei sai kontinudór misaun Jezús no sira tenke lori proposta salvasaun no libertasaun ne'ebé Maromak halo ba ema sira iha Jezús, ba rai tomak.

Leitura daruak sujere comunidade dixípulu sira fundamentalmente comunidade ema sira-nian ne'ebé Maromak hadomi. Ninia misaun iha mundu mak fó sasin Maromak nia domin ba ema sira – domin rohan-laek, la-kotu, gratuitu no absolutamente úniku.

LEITURA I – Ex 19,2-6a

Testu ne'ebé propoin mai ita halo parte “tradisaun sira kona-ba aliansa Sinai nian” – ho orijen lahanesan, ne'ebé iha denominadór komún reflesau kona-ba kompromisu ida (“berit” – “aliansa”) ne'ebé Israel asume ho Jahwéh.

Testu situa ita iha dezertu Sinai nian, “iha foho oin”. Iha testu bíbliku, la iha indikasaun jeográfika suficiente atu identifika “foho aliansa nian”. Sinai la'ós foho ida, maibé península boot ida ho forma triangulár, ho maizumenu 420 km luan norte/sul. Península ne'e dezertu maran ida, ladún iha ema hela ba, fatuk-laran no ho foho sira to'o aas metru 2400.

Tradisaun sarani sék. IV dK identifika “foho aliansa” ho “Gebel Musah” (“foho Moisés nian”), foho ida ho metru 2244 altitude nian, situa iha península sinaítika nia tasi-mane. Maski identifikasaun “foho aliansa nian” lori problema, “Gebel Musah” mak ohin loron sei sai fatin peregrinasaun ba ema judeu no sarani sira.

Iha fatin ne'e, Sinai, iha “foho ida” nia oin mak Jahwéh no Israel kompromete an eiha “aliansa” ida. Liafuan ebraika “berit”, uza dalabarak iha kontestu ida-ne'e, define paktu entre parte rua, ne'ebé implika direitu no obrigasaun sira entre sira. “Berit” maski dalabarak la hakerek maibé iha valór jurídiku. Baibain kompromisu ne'e taka ho rituál ida ne'ebé uzu sira konsagra, no inklui juramentu no sakrifisio animál nian.

Ho eskema jurídiku ida-ne'e mak Israel sei apresenta ninia kompromisu ho Jahwéh.

LEITURA II – Rom 5,6-11

Surat ba Romanu sira mak testu ida tasak, Paulo hakerek iha tinan sira 57/58 no iha-ne'ebé apóstolu apresenta síntese ida ninia mensajen no pregasaun nian. Pretestu surat nian mak projetu pasajen husi Roma, iha dalan ba Espana (kf. Rom 16,23-24): Paulo sente katak ninia misaun iha loro-sa'e remata ona no hakarak haklaken iha loromonu.

Maibé, maioria estudiozu sira Surat ba Roma nia opiniaun mak Paulo uza pretestu ida-ne'e atu fó hanoin katak ba sarani sira mai husi judaizmu no paganizmu kona-ba esensial mensajen sarani nian. Paulo insiste, liuliu faktu katak salvasaun la'ós ema nia konkista, maibé don ida Maromak nia domin nian. Loloos, ema hotu moris iha salan, basá salan mak realidade universal ida (kf. Rom 1,18-3,20); maibé Maromak iha ninia laran-di'ak, “justifika” no salva (kf. Rom 3,1-5,11); no salvasaun ida-ne'e Maromak oferese ba ema liuhusi Jezús Kristu; ba ema, importante mak adere ba proposta salvasaun ida-ne'e, iha fiar (kf. Rom 5,12-8,39).

Testu ne'ebé propoin mai ita mak parte finál pasajen ida ne'ebé hahu iha Rom 5,1. Iha pasajen ne'e, Paulo esplika kona-ba saida mak suli husi “justifikasaun” ne'ebé Maromak oferese mai ita: uluknanai,

dame, katak soin sira nia plenitude (kf. Rom 5,1); daruak, esperansa, ne'ebé permiti atu ita la'o iha mundu ne'e hodi foti ulun, ho matan sira hateke ba futuru glória nian iha moris nakonu (kf. Rom 5,2-4).

EVANJELLU – Mt 9,36-10,8

«Haree tiha ema lubun boot, Nia hanoin teb-tebes sira, basá sira kole no neon nakraik, hanesan bibi sira ne'ebé bibi-atan la iha. Tan ne'e Nia dehan ba eskolante sira: “To'os boot duni, maibé to'os atan uitoan. Ne'e duni imi harohan ba to'os na'in atu haruka to'os atan sira ba nia to'os.

Nia bolu nia eskolante sira na'in sanulu-resin-rua hodi fó kbiit ba sira atu duni sai espíritu foer sira, no mós atu fó isin di'ak ba sira hotu ne'ebé terus moras oi-oin. Apóstolu sira naran mak ne'e: ida uluk, Simão ne'ebé hanaran Pedro, ho nia alin André; Tiago, Zebedeu nia oan, ho nia alin João; Filipe ho Bartolomeu, Tomé ho Mateus Publikanu, Tiago, Alfeu nia oan, ho Tadeu, Simão Kananeu ho Judas Iscariotes, ne'ebé saran Nia ba mate.

Jezús haruka ema na'in sanulu-resin-rua ne'e bá hodi hanorin uluk sira dehan: “Imi keta tuir jentiu sira nia dalan, keta tama iha Samaritanu sira nia sidade, maibé imi buka uluk bibi sira ne'ebé lakon husi Israel nia uma-kain. Imi haklaken tuir dalan katak reinu lalehan besik ona. Imi halo moras sira hetan isin di'ak, halo mate sira moris fali, halo moras lepra sira sai moos, duni sai diabu sira. Imi simu la sosa, fó mós keta hein ema selu imi».

KONTESTU

Depoizde apresenta Jezús (kf. Mt 1,1-4,22) no hatudu Jezús haklaken “Reinu” ho liafuan no hahalok (kf. Mt 4,23-9,35), Mateus haktuir enviu dixípulu sira-nian iha misaun (kf. Mt 9,36-11,1). Dixípulu sira mak ema sira ne'ebé Jezús bolu, ne'ebé hatán pozitivamente ba bolun ida-ne'e no tuir Jezús; durante dalan ne'ebé sira halo ho Jezús, sira rona ninia ensinamentu sira no haree ninia sinál sira. Jezus forma sira iha “eskola Reinu” nian, no agora sira bele bá mundu, Jezús bele haruka sira atu haklaken ba ema hotu “Reinu Lalehan” ne'ebé to'o ona mai. Estudiozu sira Evanjellu Mateus nian kostuma hanaran testu husi 9,36 to'o 11,1, “diskursu misaun nian”: iha nia, Jezus haruka dixipulu sira no define dixipulu sira-ne'e nia misaun – haklaken Reinu ne'ebé to'o mai. Diskursu misaun nian ne'e iha parte oioin: introdusaun (kf. Mt 9,36-38); bolun no enviu dixípulu sira-nian (kf. Mt 10,1-15); instrusaun kona-ba “dalan” ne'ebé dixípulu sira tenke halo (kf. 10,16-42); konkluzuan ida (kf. Mt 11,1).

Ne'e mak diskursu ida Mateus hakerek hodi uza materiál oioin, Autór ne'e kombina iha ne'e relatu sira enviu nian, Jezús nia “liafuan sira” no liafuan sira sleuk ne'ebé Nia ko'alia iha kontestu seluk.

Mateus hakerek ninia Evanjellu durante dékada 80. Nia dirije ba comunidade ida ne'ebé moris no ho entuziazmu, profundamente empenha an iha atividade misionária (karik comunidade sarani Antioquia iha Síria). Maibé, difikuldade iha anúnsiu Evanjellu nian no persegisaun sira halo comunidade hakfodak, dezorientada. Iha kontestu ida-ne'e, Mateus hakerek buat ruma hanesan “manuál misionáriu sarani nian”, ne'ebé nia abut mak Jezús Kristu nia misaun, hodi apresenta konteúdu sira anúnsiu nian ne'ebé dixípulu sira tenke haklaken no define attitude fundamentál sira ne'ebé misionáriu sira tenke asume.

MENSAJEN

Iha introdosaun (kf Mt 9,36-38), Mateus esplika katak misaun ne'ebé Maromak bolu nia dixípulu sira mak espresaun Maromak nia atensaun, ne'ebé hakarak oferese salvasaun ba nia Povu.

Israel mak comunidade ida, iha-ne'ebé nia bibi-atan sira la hala'o sira-nia responsabilidade, bibi-atan aat sira ne'ebé profeta sira uluk ko'alia kona-ba sira (kf Ez 34; Zac 10,2). Maromak nia fuan nakonu ho kompaixaun ba bibi sira-ne'ebé kole no la dezanimadu; Maromak sei asumi ninia responsabilidade, katak sei lori nia Povu ba fatin ho duut matak sira ne'ebé iha moris.

“To'os” indika misaun urjente no parese liga ho Maromak nia juizu ne'ebé besik ona (kf Is 17,5; Jer 13,24; Jl 4,12-13); referénsia ba “husu” ne'ebé tenke halo ba “to'os” nia Na'i mak apelu ida atu comunidade kontempla misaun nu'udar Maromak nia obra ida, ne'ebé tenke lori ba oin ho Maromak nia kritériu sira.

Hafoin mai dixípulu sira-nia bolun (kf Mt 10,1-4). Mateus hahú hodi halo klaru katak inisiativa ne'e Jezús nian: Nia mak bolu sira. La iha espliksaun ida kona-ba kritériu sira ne'ebé lori ba hilin ne'e: ko'alia kona-ba vokasaun no eleisaun signifika ko'alia kona-ba mistériu ida, ne'ebé depende husi Maromak no ema dalabarak la konsege komprende no esplika.

Númeru 12 mak númeru simbóliku, ne'ebé fó hanoin kona-ba tribu 12 Maromak nia Povu antigunian.

Hafoin Mateus define misaun ne'ebé Jezús entrega ba sira (duni espíritu foer sira no fó isin di'ak ba moras hotu). Espíritu foer, moras sira reprezenta buat hotu ne'ebé halo ema sai atan no impede atu to'o ba moris nakonu. Dixípulu nia misaun mak luta kontra buat hotu - , ho karáter fíziku ka espírituál ne'ebé harahun moris no ema nia ksolok. Ita bele dehan katak dixípulu sira-nia misaun mak hafunu "salan".

Finalmente, Mateus fó sai na'in "Sanulu-Resin-Rua" nia naran (Simão Pedro, André, Tiago filho de Zebedeu, João, Filipe, Bartolomeu, Tomé, Mateus, Tiago Alfeu, Tadeu, Simão kananeu no Judas Iscariotes). Hanesan ho Evanjellu sinótiku seluk, Pedro nia naran mai uluk no Judas Iscariotes mak taka lista ne'e. Sira rua mak karik, personajen forte liu no, depoizde la'o kleur ho Jezús, karik asume protagonizmu ruma iha grupu dixípulu sira-nian.

Pasu ikus mak mandatu eh haruka dixípulu sira ba misaun, depoizde fó instrusaun sira ba oinsá hala'o misaun (kf Mt 10,5-8).

Uluknanai (vers. 5-6), Jezús define destinatáriu sira misaun nian: iha faze dahuluk, "bibi sira ne'ebé lakon husi uma Israel nian". Interpretasaun ne'e esplika oinsá kristianizmu hahú, husi Palestina no hafoin mak bá fronteira sira Palestina nian. Mateus ikusmai dehan katak "uma Israel" rejeita Jezús no ninia proposta Reinu, nune'e iha faze daruak, anúnsiu destina ba ema jentiu sira mós (kf Mt 21,43). Daruak (vers. 7-8a.b.c.d), aponta sinál sira ne'ebé tenke akompaña anúnsiu kona-ba "Reinu" ninia vinda: kura moras sira, resurreisaun mate sira-nian, duni sai demóniu sira. Anúnsiu la'ós de'it ho liafuan maibé ho mós jestu konkretu sira ne'ebé sai sinál vizivel libertasaun ne'ebé "Reinu" lori mai. Datoluk (vers. 8e), mosu apelu ida ba gratuidade: dixípulu sira labele bá misaun hodi hanoin atu hetan rekompensa ka manán buat ruma, ka atu satisfás interese egoista sira. Espresaun "imi simu degrasa, fó degrasa" konvida atu halo moris rasik nu'udar don gratuitu ba "Reinu", hodi la hein troka ho selu kolen ruma.

Dixípulu nia misaun mak prolongamentu Jezús nia misaun nian. Anúnsiu ne'ebé entrega ba dixípulu sira, mak anúnsiu ne'ebé Jezús halo ("Reinu"); jestu sira ne'ebé dixípulu sira hetan konvite atu halo mak haklaken "Reinu", hanesan ho buat ne'ebé Jezús halo; destinatáriu sira Jezús nia mensajen nian hanesan ho dixípulu sira-nian. Nune'e dixípulu sira nia misaun mak continuidade ho Jezús nia misaun. Jezús konvida Igreja (dixípulu sira) atu kontinua iha istória obra libertadora ne'ebé Nia hahú ba ema nia di'ak.